

四庫全書

集部

欽定四庫全書

集部

唐詩品彙卷一
四至

詳校官檢討_臣德生

助教_臣常循覆勘

總校官進士_臣朱鈐

校對官編修_臣勵守謙

謄錄監生_臣慙意誠

欽定四庫全書

唐詩品彙卷一

明 高棅 編

五言古詩一

正始 上

太宗皇帝

幸武功慶善宮賦

上所生之宮也貞觀六年幸之宴從臣賞賜閭里同漢沛

宛帝歡甚賦詩起居郎呂才被之
管絃為功成慶善樂名九功之舞

壽丘唯舊跡豐邑乃前基
粵予承累聖縣孤亦在茲
弱齡逢運改提劍鬱匡時
指麾八荒定懷柔萬國夷
梯山盛入款駕海亦來思
單于陪武帳日逐衛文幄
端扈朝四岳無為任百司
霜節明秋景輕冰結水湄
芸黃遍原隰禾穎積京坻
共樂還鄉宴歡此大風詩

正日臨朝

條風開獻節灰律動初陽
百蠻奉遐書萬國朝未央
雖無舜禹跡幸欣天地康
車軌同入表書文混四方
赫奕

儼冠蓋紛綸盛服章羽旄飛馳道鐘鼓振巖廊組練輝
霞色霜戟耀朝光晨宵懷至理終愧撫遐荒

春日玄武門宴羣臣

韶光開令序淑氣動芳年駐輦華林側高宴栢梁前紫
庭文樹滿丹墀袞紱連九夷筵瑤席五狄列瓊筵娛賓
歌湛露廣樂奏鈞天清樽浮綠醕雅曲韻朱絃粵余君
萬國還慚撫八埏庶幾保貞固虛已厲求賢

經破薛舉戰地

昔年懷壯氣提戈初仗節心隨朗日高志與秋霜潔移
鋒驚雷起轉戰長河決營碎落星沉陣卷橫雲裂一揮
氛沴靜再舉鯨鯢滅於茲撫舊原屬目駐華軒沉沙無
故跡滅竈有殘痕浪霞穿水淨峯霧抱蓮昏世途亟流
易人事殊今昔長想眺前蹤撫躬聊自適

飲馬長城窟行

塞外悲風切交河水已結瀚海百重波陰山千里雪迴
戍危烽火層巒引高節悠悠卷旆旌飲馬出長城寒沙

連騎跡朔吹斷邊聲胡塵清玉塞羌笛韻金鉦絕漠干
戈戢車徒振遠隰都尉反龍堆將軍旋馬邑揚麾氛霧
靜紀石功名立荒裔一戎衣雲臺凱歌入

虞世南

世南與兄世基學于顧野王文章婉縟太宗嘗
作宮體詩使世南和世南曰聖作誠工然體非
雅正臣恐此詩一傳天下風靡不敢奉詔帝曰
朕試卿耳後帝為詩述古興亡既而嘆曰鍾子
既死伯牙不復鼓琴朕此詩將何
所示耶初褚遂良即其靈座楚之

從軍行

塗山峰候驚弭節度龍城冀馬樓蘭將燕犀上谷兵劍
寒花不落弓曉月逾明凜凜嚴霜節冰壯黃河絕蔽日
卷征蓬浮天散飛雪全兵值月滿精騎乘膠折結髮早
驅馳辛勤事旌麾馬凍重關冷輪摧九折危獨有西山
將年年屬數奇

出塞

上將三畧遠元戎九命尊緬懷古人節思酬明主恩山
西多勇氣塞北有遊魂揚鞭上隴阪勒騎下平原誓將

絕沙漠悠然去玉門輕齋不遑舍驚策驚戎軒凜凜邊
風急蕭蕭征馬煩雪暗天山道冰塞玉河源霧鋒黯無
色霜旗凍不翻耿介倚長劍日落風塵昏

結客少年場

韓魏多奇節個儻遺聲利共矜然諾心各負縱橫志結
交一言重相期千里至綠沈明月弦金絡浮雲轡吹蕭
入吳市擊筑遊燕肆尋源博望侯結客遠相求少年重
一顧長驅背隴頭皸皸戈霜動耿耿劍虹浮天山冬夏

雪交河南北流雲起龍沙暗木落鴈門秋輕生徇知己
非是為身謀

魏徵

太宗燕羣臣積翠池徵賦西漢辛云終籍叔孫
禮方知皇帝尊帝曰徵言未嘗不約我以禮及
卒帝賦詩痛悼哭
為之慟罷朝五日

暮秋言懷

首夏別京輔杪秋滯三河沈沈蓬萊閣日夕鄉思多霜
剪涼地蕙風捎幽堵荷歲芳坐淪歇感此式微歌

述懷

中原還逐鹿投筆事戎軒縱橫計不就慷慨志猶存策
杖謁天子驅馬出關門請纓繫南越憑軾下東藩鬱紆
陟高岫出沒望平原古木鳴寒鳥空山啼夜猿既傷千
里目還驚九折魂豈不憚艱險深懷國士恩李布無二
諾侯嬴重一言人生感意氣功名誰復論

王績

古意

桂樹何蒼蒼秋來花更芳自言歲寒性不知露與霜幽
人重其德徙植臨前堂連奉八九樹偃蹇二三行枝
自相糾葉葉還相當去來雙鴻鵠栖息兩鴛鴦榮陰誠
不厚斤斧亦不傷赤心許君時此意那可忘

田家

家住箕山下門枕潁川濱不知今有漢唯言昔避秦琴
伴前庭月酒勸後園春自得中林士何忝上皇人

許敬宗

奉和行經破薛舉戰地應制

混元分大象長策挫脩鯨於斯建宸極由此創鴻名一
戎乾宇泰千祀德流清垂衣凝庶績端拱鑄羣生復整
瑤池駕還臨官渡營周遊尋曩迹曠望動天情惟宮面
丹浦帳殿矚宛城虜場栖九旻前歌被六英戰地甘泉
涌陣處景雲生普天沾凱澤相攜欣頌平

岑文本

奉和正日臨朝

時雍表昌運日正叶靈符德兼三代禮功包四海圖踰
沙紛在列執玉儼相趨清蹕喧輦道張樂駭天衢拂蜺
九旗映儀鳳八音殊佳氣浮仙掌薰風繞帝梧天文光
七政皇恩被九區方陪瘞玉禮珥筆岱山隅

楊師道

奉和聖製春日望海

春山臨渤海征旅輟晨裝迴瞰盧龍塞斜瞻肅慎鄉洪
波迴地軸孤嶼映雲光落日驚濤上浮天駭浪長仙臺

隱螭駕水府汎鼃梁碣石朝煙滅之杲歸鴈翔北巡非
漢后東幸異秦皇塞旌羽林客跋距少年塲電擊驅遼
水鵬飛出帶方將舉青丘繳安訪白霓裳

中書寓直詠雨簡褚起居上官學士

雲暗蒼龍闕沈沈殊未開牕臨鳳沼颯颯雨聲來電
影入飛閣風威凌吹臺長簷響奔溜清簟浮埃早荷
葉稍沒新篁枝半摧茲晨悵多緒懷友自難裁况復重
城內日暮獨徘徊玉階良史筆金馬掞天才高麗通散

騎復道駕蓬萊思君贈桃李於北冀瓊瑤

劉孝孫

遊清都觀尋沈道士

得仙字

紛吾因暇豫行樂極留連尋真謁紫府披霧覩青天緬
懷金闕外遐想玉京前飛軒俯松柏抗殿接雲煙滔滔
清夏景嘒嘒早秋蟬橫琴對危石酌醴臨寒泉聊祛塵
俗累寧希龜鶴年無勞生羽翼自可狎神仙

凌敬

遊清都觀尋沈道士

得都字

聊排靈鎖闥徐步入清都青溪冥寂士思玄徇道樞十
芒生藥笥七焰發丹爐縹袞桐君錄朱書王母符宮槐
散綠穗日槿落青柎翰雷門鶴飛來葉縣鳧凌風自
可御安事迫中區方追羽化侶從此得玄珠

趙中虛

遊清都觀尋沈道士

得芳字

青溪阻千仞姑射藐汾陽未若遊茲境探玄衆妙場鶴

金少隱詩集卷一
來疑羽客雲沈似蜺裳寓目雖靈宇遊神乃帝鄉道存
真理得心灰俗累忘烟霞凝抗殿松桂肅長廊早蟬清
暮景崇蘭散晚芳即此翔寥廓非復控榆枋

董思恭

三婦艷

大婦裁紉素中婦美明璫小婦多姿態登樓紅粉粧
人且安坐初日漸流光

王紹宗

三婦艷

大婦能調瑟中婦詠新詩小婦獨無事花庭曳履綦上
客且安坐春日正遲遲

上官儀

早春桂林殿應詔

步輦出披香清歌臨太液曉樹流鶯滿春堤芳草積風
色一作光翻露文雪華上空碧花蝶來未已山光曖將夕

訓薛舍人萬年宮晚景寓直懷友

奕奕九成臺窈窕絕塵埃蒼蒼萬年樹玲瓏下冥霧池
色搖晚空巖花斂餘照清切丹禁靜浩蕩文河渺留連
窮勝託夙期睽善謔東望安仁省西臨子雲閣長嘯披
烟霞高步尋蘭若金狄掩通門雕鞍歸騎喧燕姝對明
月荆艷促芳樽別有青山路策杖訪王孫

張文琮

同藩屯田冬日早朝

假寐懷古人夙興瞻曉月通晨禁門啓冠蓋趨朝謁霜

靄清九衢霞光照雙闕紛綸文物紀煥爛聲明發腰劍

動陸離鳴玉和清越

未疑有闕

章懷太子

黃臺瓜辭

武后殺太子弘而立賢為太子賢日懷憂惕知不能保全無由敢言乃作

是辭命樂工歌之冀后聞而感悟後終為所逐死於獄中

種瓜黃臺下瓜熟子離離一摘使瓜好再摘令瓜稀三摘尚自可摘絕抱蔓歸

王勃

山亭夜宴

桂宇幽襟積山亭涼夜永森沉野徑寒
蕭穆巖扉靜竹
海南河色荷翻北潭影清興殊未歸

一作
闌

林端照初景

詠風

蕭蕭涼景生加我林壑清
驅烟尋磴戶卷霧出山楹
去來固無跡動息如有情
日落山水靜為君起松聲

懷山

客有自幽山來者起予以林壑之事而煙霞在焉

思解纓紱永詠山水神與道超跡為形滯故書其

事焉

各本皆作懷
仙今依原本

鶴岑有奇徑麟洲富仙家紫泉漱珠液玄巖列丹葩常
希披塵網眇然登雲車鸞情極霄漢鳳想疲煙霞道存
蓬瀛近意愜朝市賒無為坐惆悵虛此江上華

忽夢遊仙

僕本江上客牽迹在方內寐寤霄漢間居然有靈對翕
爾登霞首依然躡雲背電策驅龍光煙途儼鸞態乘月

披金帔連星解瓊珮浮世俄易歸真魂邈難再寥廓沈
遐想周遑奉遺誨流俗非我鄉何當釋塵昧

楊炯

廣溪峽

三峽有序不錄

廣溪三峽首曠望兼川陸山路遶羊腸江城鎮魚腹喬
林百丈偃飛水千尋瀑驚浪迴高天盤渦轉深谷漢氏
昔云季中原爭逐鹿天下有英雄襄陽有龍伏常山集
軍旅永安興板築池臺忽已傾邦家遽淪覆庸才若劉

禪忠佐為心腹設險猶可存當無賈生哭

巫峽

三峽七百里唯言巫峽長重巖宵不極疊嶂凌蒼蒼絕
壁橫天險莓苔爛錦章入夜分明見無風波浪狂忠信
吾所蹈汎舟亦何傷可以涉砥柱可以浮吕梁美人今
何在靈芝徒有芳山空夜猿嘯征客淚沾裳

西陵峽

絕壁聳萬仞長波射千里盤薄荆之門滔滔南國紀楚

都昔金盛高丘烜望祀秦兵一旦侵夷陵火潛起四維
不復設關塞良難恃洞庭且忽然益門終已矣自古天
地開流為峽中水行旅相贈言風濤無極已及余踐斯
地瓌奇信為美江山若有靈千載伸知己

駱賓王

夏日同夏少府遊山家

返照下層岑物外狎招尋
蘭徑薰幽佩槐庭落暗金
谷靜風聲徹山空月色深
一遣樊籠累唯餘松桂心

晚憇田家

轉蓬勞遠役披薜下田家山形類九折水勢急三巴懸
梁接斷岸澀路擁崩杳霧巖淪曉魄風淑漲寒沙心跡
一朝舛關山萬里賒龍章徒表越閩族本殊一作非華旅
行勞一作悲汎梗離贈折疎麻唯有寒潭菊猶似故園花

盧照鄰

關山月

塞垣通碣石虜障抵祈連相思在萬里明月不長懸影

移金岫北光斷玉門前寄言閨中婦愁看鴻鴈天

上之回

回中道路險蕭關烽候多五營屯右地萬乘出西河單
于拜玉璽天子按琱戈振旅汾川曲秋風橫大歌

君馬黃

驅馬照金鞍轉戰入臯蘭塞門風稍急長城水正寒雪
暗鳴珂重山長噴玉難不辭橫絕漠流血幾時乾

劉生

劉生氣不平，抱劍欲專征。
報恩為豪俠，死難在橫行。
翠羽裝劍鞘，黃金鏤馬纓。
但令一顧重，不恡百身輕。

結客少年場行

長安重遊俠，雒陽富才雄。
玉劍浮雲騎，金鞭明月弓。
關雞過渭北，走馬向關東。
滌賓遙見待，郭解暗相通。
不受千金爵，誰論萬里功。
將軍上天上，虜騎入雲中。
烽火夜似月，兵氣曉成虹。
橫行徇知己，負羽遠從戎。
龍旌昏朔霧，鳥陣卷胡風。
追奔瀚海咽，戰罷陰山空。
歸來謝天子，

何如馬上翁

贈李榮道士

有序
不錄

錦節銜天使瓊仙駕羽君投金翠山曲奠壁清江瀆圓
洞開丹鼎方壇聚絳雲資貺幽難識空歌迴易分風搖
十洲影日亂九江文敷誠歸上帝應詔在明君獨有南
冠客耿耿泣離羣遙看八曾所真氣曉氛氲

早度分水嶺

丁年遊蜀道斑鬢向長安徒費周王粟空彈漢吏冠馬

蹄穿欲盡貂裘故轉寒層冰橫九折積石凌七盤重谿
既下漱峻峰亦上千隴頭聞戍鼓嶺外咽飛湍瑟瑟松
風急蒼蒼山月團傳語後來者斯路誠獨難

三月曲水宴

風煙彭澤里山水仲長園由來棄銅墨本自重瑟樽高
情邈不嗣雅道今復存有美光時彥養德坐山樊門開
芳杜逕室距桃花源公子黃金勒仙人紫氣軒長懷去
城市高詠挹蘭蓀連沙飛白鷺孤嶼嘯玄猿日影巖前

落雲花江上翻興闌車馬散林塘夕鳥喧

奉使益州至長安發鍾陽驛

躋險方未夷乘春聊騁望落花赴丹谷奔流下青嶂
歲曉樹滋澆淹春江漲平川看釣侶狹徑聞樵唱蝶戲
綠苔前鶯歌白雲上耳目多異賞風煙有奇狀峻阻將
長城高標吞巨舫聯翩事羈勒辛苦勞疲恙夕濟幾潺
湲晨登每惆悵誰念復芻狗山河獨偏喪

和王奭秋夜有所思

寂寂南軒夜悠然懷所知長河落鴈苑明月下鯨池鳳
臺有清曲此曲何人吹丹唇間玉齒妙響入雲涯窮巷
秋風葉空庭寒露枝勞歌欲有和星鬢已將垂

詠史三首

季生昔未達身辱功不成髡鉗為臺隸灌園變姓名幸
逢滕將軍兼遇曹丘生漢祖廣招納一朝拜公卿百金
孰云重一諾良匪輕廷議斬樊噲羣公寂無聲處身孤
且直遭時坦而平丈夫當如此唯唯何足榮

大漢昔云季小人道遂振玉帛委奄君斧鑕嬰縉紳邈
哉郭先生卷舒得其真雍容謝朝廷談笑獎人倫在晦
不絕俗處亂不為親諸侯不得友天子不得臣沖情甄
負甌重價折角巾悠悠天下士相送洛橋津誰知仙舟
上寂寂無四鄰

公業負奇志交結盡才雄良田四百頃所食常不充一
為侍御史慷慨說何公前公何不敗吾謀適不同仲穎
恣殘忍廢興良在躬死人如亂麻天子如轉蓬干戈及

黃屋荊棘生紫宮鄭生運其謀將以清國戎時來命不
遂脫身歸山東凜凜千載下穆然懷清風

劉庭芝

將軍行

將軍闢轅門耿介當風立諸將欲言事逡巡不敢入劍
氣射雲天鼓聲振原隰黃塵塞路起走馬追兵急彎弓
從此去飛箭如雨集截圍一百重斬首五千級代馬流
血死胡人抱鞍泣古來養甲兵有事常討襲乘我廟堂

運坐使干戈戢獻凱歸京師軍容何翕習

從軍行

秋天風颯颯羣胡馬行疾嚴城晝不開伏兵暗相失天子廟堂拜將軍凶門出紛紛晉陽道戎馬幾萬足軍門壓黃河兵氣衝白日平生懷仗劍慷慨即投筆南登漢月孤北走代雲密近取韓彭計早知孫吳術丈夫清萬國誰能掃一室

嵩嶽聞笙

月出嵩山東月明山益空山人愛清景散髮卧秋風
止夜何清獨夜草蟲鳴仙人不可見乘月近吹笙絳脣
吸靈氣玉指調真聲真聲是何曲三山鸞鶴情昔去洛
塵俗願言聞此曲今來卧嵩岑何幸承幽音神仙樂吾
事笙歌銘夙心

秋日題南陽潭壁

獨坐秋陰生悲來從所適行見汝陽潭飛蘿蒙水石懸
瓢木葉上風吹何歷歷幽人不耐煩振杖步聞寂迴流

清見底金沙覆銀礫錯落非一文空隴幾千尺魚鱗可
憐紫鴨毛自然碧吟詠秋水篇渺然亡損益秋水隨形
影清濁混心迹歲暮歸去來東山余宿昔

采桑

楊柳送行人青青西入秦誰家采桑女樓上不勝春盈
盈灞水曲步步春芳綠紅臉耀明珠絳唇含白玉回首
渭橋東遙憐春色同青絲嬌落日絳綺弄春風攜籠長
歎息逶迤戀春色看花若有情倚樹疑無力薄暮思悠

悠使君南陌頭相逢不相識歸去夢青樓

春女行

春女顏如玉怨歌陽春曲巫山春樹紅沅湘春草綠自
憐妖豔姿粧成獨見時愁心伴楊柳春盡亂如絲目極
千餘里悠悠春江水頻想玉關人愁卧金閨裏尚言春
花落不知秋風起嬌愛猶未終悲涼從此始惜昔楚王
宮玉樓粧粉紅纖腰弄明月長袖舞春風容華委西山
光陰不可還桑林沒東海富貴今何在寄言桃李容胡

為閨閣重但看楚王墓唯見數株松

孤松篇

蠶月桑葉青鶯時柳花白澹豔煙雨姿敷芳陽春陌如
何秋風起零落從此始獨有南澗松不歎東流水玄陰
天地冥皓雪朝夜零豈不懼寒暑為君留青青青青好
顏色落落任孤直羣樹遙相望衆草不敢逼靈龜卜真
隱仙鳥宜栖息耻受秦帝封願言唐侯食寒山夜月明
山冷氣清清淒兮歸鳳集吹之作琴聲松子卧仙岑寂

聽疑野心清冷有真曲樵采無知音美人何時來幽徑
委綠苔吁嗟深澗底棄捐廣厦材

謁漢世祖廟

舂陵氣初發漸臺首未傳列營百萬衆持國十八年運
開朱旗後道合赤符先宛城劍鳴匣昆陽鏑應弦獷獸
血塗地巨人聲沸天長驅過北趙短兵出南燕太守迎
門外王郎死道邊昇壇九成陌端拱千秋年朝廷方雀
躍劍佩幾聯翩至德刑四海神儀翳九泉宗子行舊邑

恭聞清廟篇君家穆而聖臣像儼猶賢攢木承危柱疎
蘿挂朽椽祠庭巢鳥啄祭器網蟲緣懷古江山在惟新
歷數遷空餘今夜月長似舊時懸

盧崇道

新都南亭別郭大元振

竹徑女蘿蹊蓮洲文石隄靜深人俗斷尋翫往還迷碧
潭秀初月素林驚夕栖褰幌納鳥侶罷琴聽猿啼佳辰
改宿昔勝寄在睽攜長懷賞心愛如月復如珪

喬知之

苦寒行

胡天夜清迴孤雲獨飄揚
搖曳出鴈關逶迤舍晶光
陰陵久裴徊幽都無多陽
初寒凍巨海殺氣流大荒
朔馬飲寒冰行子履胡霜
路有從役倦卧死黃沙場
羈旅因相依慟之淚沾裳
由來從軍行賞存不賞亡
亡者誠已矣徒令存者傷

從軍行

金分四卷之三
卷一
南庭結白露北風掃黃葉此時鴻鴈來驚鳴催思妾曲
房理針線平砧搗文練鴛綺裁易成龍鄉信難見窈窕
九重閨寂寞十年啼紗牕白雲宿羅幌月光栖雲月曉
微微愁思流黃機玉霜凍珠履金吹薄羅衣漢家已得
地君去將何事宛轉結蠶書寂寥無鴈使平生荷恩信
本為容華進况復落紅顏蟬聲催綠鬢

蘇味道

單于川對雨

崇朝邁行雨薄晚屯密雲綠階起素沫竟水聚圓文河
柳低未舉山桃落已芬清樽久不薦淹留遂待君

李嶠

嶠兒時曾夢人遺之雙筆
自是有文詞富才思云

秋山望月酬李騎曹

愁客坐山隈懷抱自悠哉况復高秋夕明月正裒徊亭
亭出迴岫皎皎映層臺色帶銀河滿光含玉露開白雲
籠影度虛暈抱輪迴谷邃涼陰靜山空夜響哀寒催數

鴈過風送一螢來攔軫離居恨遙憶故人杯

早發苦竹館

合沓巖嶂深朦朧煙霧燒荒阡下樵客野猿驚山鳥開
門聽潺湲入徑尋窈窕栖巖抱寒木流螢飛暗篠早霞
稍霏霏殘月猶皎皎行看遠星稀漸覺遊氛少我行撫
輶傳兼得旁林沼貪翫水石奇不知川路渺徒憐野心
曠詎惻浮年小方解寵辱情永言出塵表

安輯嶺表事平罷歸

雲端想京縣帝鄉如可見天涯望越臺海路幾悠哉六
月飛鵬去三年瑞雉來境遙銅柱出山險石門開自我
逢瀍洛瞻途屢揮霍朝朝寒露多夜夜征衣薄白簡承
朝憲朱方撫夷落既弘天覆廣且諭皇恩博皇恩溢外
區憬俗詠來蘇聲朔臣天子壇場拜老夫絳官韜將畧
黃石寢兵符返旆收龍虎空營集烏烏日落澄氛靄憑高
視衿帶東甌抗于越南斗臨吳會春色遶邊陲飛花出
荒外卉服紛如積長川思遊客風生丹桂晚雲起蒼梧

夕去軸艤清江歸軒趨紫陌衣棠會百蠻賸賣委重關
不學金刀使空持寶劍還

崔融

關山月

月生西海上氣逐邊風壯萬里照關山蒼茫非一狀漢
兵開郡國胡馬窺亭障夜夜聞悲笳征人起南望

擬古

飲馬臨濁河濁河深不測河水日東注河源迺西極思

君正如此誰為生羽翼日夕大川陰雲霞千里色所思
在何處宛在機中織離夢當有魂愁容定無力夙齡負
奇志中夜三歎息拔劍斬長榆彎弧射小棘班張固非
擬衛霍行可即寄謝閨中人努力加餐食

塞垣行

疾風卷溟海萬里揚沙礫仰望不見天昏昏竟朝夕是
時軍兩進東拒復西敵蔽山張旗鼓間道潛鋒鏑精騎
突曉圍奇兵襲暗壁十月邊塞寒四山返陰積雨雪鴈

南飛風塵景西迫昔我事討論未嘗怠經籍一朝棄筆
硯十年操矛戟豈要黃河誓須勒燕山石可嗟牧羊臣
海外久為客

西征軍行遇風

北風卷塵沙左右不相識颯颯吹萬里昏昏同一色馬
煩不敢進人急未遑食草木春更悲天景晝相匿夙齡
慕忠勇雅尚存孤直覽史懷浸驕讀詩歎孔棘及茲戎
旅地亦從書記職兵氣騰北荒軍聲振西極坐覺威靈

遠行看祲氣息愚臣何以報倚馬申微力

杜審言

送和蕃使

原集蕃上有西字

使出鳳凰池京師陽春晚聖朝尚邊策詔諭兵戈偃拜
手明光殿搖心上林苑種落踰青羌關山度赤坂疆場
及無事雅歌而餐飯寧獨息和戎更當封定遠

唐詩品彙卷一

欽定四庫全書

唐詩品彙卷二

明 高棟 編

五言古詩二

正始 下

沈佺期

有所思

君子事行役再空芳歲期美人曠延佇萬里浮雲思園

槿綻紅豔郊桑柔綠滋坐看長夏晚秋月照羅帷

臨高臺

高臺臨廣陌車馬紛相續迴首思舊鄉雲山亂心曲遠
望河流緩周看原野綠向夕林鳥還憂來飛景促

黃鶴

黃鶴佐丹鳳不能羣白鵬拂雲遊四海弄影到三山遙
憶君軒上來下天池間明珠世不重知有報恩環

鳳笙曲

憶昔王子晉鳳笙遊雲空揮手弄白日安能戀青宮豈
無嬋娟子結念羅帷中憐壽不貴色身世兩無窮

古別離

白水東悠悠中有西行舟舟行有返樞水去無還流奈
何生別者戚戚懷遠遊遠遊誰當惜所悲會難收自君
聞芳躡青陽四五道皓月掩蘭室光風虛蕙樓相思無
明晦長歎累春秋離居久遲莫高駕何淹留

宋之問

江左詩至沈約以音韻相婉附屬對精密及之
問與陰期又如靡麗曲忌聲病約句準篇如錦
繡成文學者宗之號為沈宋
語曰蘇李居前沈宋比肩

初到陸渾山莊

授衣感窮節策馬凌伊關歸齊逸人趣日覺秋琴間寒
露衰北阜夕陽破東山浩歌步岑樾栖鳥隨我還

夜飲東亭

春水鳴大壑皓月吐層岑岑壑景色佳慰我遠遊心暗
芳足幽氣驚栖多東音高興南山曲長謠橫素琴

送趙六貞固

目斷南浦雲心醉東郊柳
怨別此何時青芳來已久
與君共時物盡此盈樽酒
始願今不從春風戀攜手

題老松樹

歲晚東巖下周顧何悽惻
日落西山陰衆草起寒色
中有喬松樹使我長歎息
百尺無寸枝一生自孤直

夜渡吳松江懷古

宿帆震澤口曉度松江濱
擢發魚龍氣舟衝鴻鴈羣
寒

潮頓覺滿暗浦稍將分氣赤海生日光清湖起雲水鄉
盡天衛歎息為吳君謀士伏劍死至今悲所聞

別之望後獨宿藍田山莊

脊令有舊曲調苦不成歌自嘆兄弟少常嗟離別多爾
尋北京路予卧南山阿泉晚更幽咽雲秋尚差我藥闌
聽蟬噪書幌見禽過愁至願甘寢其如鄉夢何

浣紗篇贈陸上人

越女顏如花越王聞浣紗國微不自寵獻作吳王娃女

數半潛匿苧蘿更蒙遮一行霸勾踐再顧傾夫差豔色
奪常人歟嘖亦相誇一朝還舊都覩粧尋若耶鳥驚入
松網魚畏沈荷花始覺冶容妄方悟羣心邪欽予秉幽
意世人共稱嗟願言托君懷倘類蓬生麻家住雷門曲
高閣凌飛霞淋漓翠羽帳旖旎采雲車春風豔楚舞秋
月綿一作纒胡笳自昔專嬌愛襲玩唯矜奢達本知空寂
棄波猶泥沙永割偏執性自長薰脩牙攜妾不障道來
止妾西家

桂州黃潭嶺祠

虞世巡百越相傳葬九疑精靈遊此地祠樹日光輝
裡祭忽羣望丹青圖二妃神來獸率舞仙去鳳還飛
日暝山氣落江空潭靄微帝鄉三萬里乘彼白雲歸

雨從箕山來

雨從箕山來條與飄風度晴明西峰日綠潯雨溪樹此
時客精廬幸蒙真僧顧深入清淨理妙斷往來趣意得
兩契如言盡共忘諭觀花寂不動聞鳥懸可悟向夕聞

天香淹留不能去

初至崖口

崖口衆山斷，嵌崿聳天壁。
氣衝落日紅，影入春潭碧。
錦繡織苔蘚，丹青畫松石。
水禽汎容與，巖花飛的皪。
微路從此深，我來限于役。
悵惆情未已，羣峰黯將夕。

自湘源至潭州衡山縣

浮湘沿迅湍，逗浦凝遠盼。
漸見江勢濶，行嗟水流漫。
赤岸雜雲霞，綠竹緣溪澗。
向背羣山轉，應接良景晏。
沓障

連夜猿平沙覆陽鴈紛吾望闕客歸橈速已慣中道方
泝洄遲念自茲撰賴欣衡陽美持以蠲憂患

入崖口五渡寄李適

抱琴登絕壑伐木泝清川路極意謂盡勢迴趣轉綿人
遠草木秀山深雲影鮮余負海嶠情自昔微尚然彌曠
十餘載今來宛仍前未窺仙源極獨進野人船時攀乳
竇憩屨薄天牕眠夜絃響松月朝楫弄苔泉

僧皎然
云靜也

因

冥象外理永謝區中緣碧潭可遺老丹砂堪學仙莫使

馳光暮空令歸鶴憐

李適

答宋十一崖口五渡見贈

聞君訪遠山躋險造幽絕眇然青雲境觀奇彌年月登
嶺亦汴溪孤舟事沿越萼嶂傳彩翠崖磴互欹缺石林
上攢叢金澗下明滅捫壁窺丹井梯苔瞰乳穴忽枉巖
中贈對翫未嘗輟殷勤獨往事委曲煉藥說邀余名山
期從爾汎海渤歲晏秉宿心斯言匪張設

汾陰后土祠作

昔余讀舊史，徧觀漢世君。武皇實稽古，建茲百代勳。號令垂懋典，舊經備闕文。南巡歷九疑，舳艫被江濱。耀兵十八萬，旌旗何紛紛。謁來茂陵下，英威不復聞。我行歲方晏，望極山河分。神光終冥漠，鼎氣獨氤氲。攬涕步睢上，登高見河汾。雄圖今安在，飛飛有白雲。

薛稷

早春魚亭山

春色動百草紛榮時斷續白雲自高妙裴徊空山曲陽
林花已紅寒澗苔未綠伊余息人事蕭寂無營欲客行
須云遠翫之聊自足

秋日還京陝西十里作

杜甫詩云少保有
古風得之郊陝篇

驅車越陝郊北顧臨大河隔河望鄉邑秋風水增波西
登咸陽塗日暮憂思多傳巖既紆鬱首山亦蹉峩操築
無昔老採薇有遺歌客遊既迴換人生知幾何

鄭愔

胡笳曲

漢將留邊朔遙遙歲序深誰堪牧馬思正是胡笳吟曲
斷關山月聲悲雨雪陰傳書問蘇武陵也獨何心

徐彥伯

擬古三首

遙裔煙嶼鴻雙影旦夕同交翰倚沙月和鳴弄江風
若茂芳序君子從遠戎雲生陰海沒花落春潭空紅淚
掩促柱錦衾羅薰籠自傷瓊草綠詎惜鉛粉紅裂帛附

雙燕為余向遼東

讀書三十載馳騫周六經儒衣干時主忠策獻闕庭一朝奉休眄從容厠羣英束身趨建禮秉筆坐承明解署相填咽察吏紛縱橫五日休澣時屠蘇繞玉屏橘花覆北沼桂樹交西榮樹棲兩鴛鴦含春向我鳴皎潔綺羅豔便娟絲管清擾擾天地間出處各有情何必巖石下枯槁間此生

顏光無淹晷逝水有迅流綠苔紛易歇紅顏不再求歌

笑當及春無令壯志秋弱年仕闕輔移門豁御溝敷愉
東城際婉孌南陌頭荷花嬌綠水楊葉暖青樓中有綺
羅人可憐名莫愁畫屏繞金膝珠簾縣玉鈎纖指調寶
琴泠泠哀且柔贈君鴛鴦帶因以鸛鷀裘
曉吟日坐
閨夕秉燭遊無作北門客吐吐懷百憂

題東山子李適碑陰

井序

噫嘻李公生自號東山子死葬東山豈其識哉神
交者歌薤露以送子歸東山為詩鐫于碑陰云

隴嶂紫氣金光赤氤氲美人含遙靄桃李方自薰
圖高黃鶴羽寶奪驪龍羣忽驚薤露曲掩噎東山雲

和李適答宋十一入崖口五渡見贈

聞有獨往客拂衣捐世心結忻薄枉渚撰念縈舊林經
亘去崖合冥綿歸壑深琪樹環碧彩金潭生翠陰
泐洞弄沙榜詭仄眺明岑夕聞桂裏猿曉玩松上禽
雜佩蘊孤袖瓊敷綴雙襟我懷滄洲想懿爾白雲吟
秉願理方叶存期跡易尋茲言庶不負為報巖中琴

吳少微

和崔侍御日用遊開化寺閣

左憲多才雄故人尤鷲鶚獲贈單于使休軺太原郭館
次厭煩歎清懷尋寂寞西緣十里餘北上開化閣初入
雲樹間冥蒙未昭廓漸出欄楯外萬里秋景焯歲晏風
落山天寒水歸壑覽物頌幽景三乘動玄鑰但敷利解
言永用忘昏著

邢象玉

古意

家中新酒熟園裏木初榮
佇杯欲取醉悵然思友生
忽聞有奇客何姓復何名
嗜酒陶彭澤能琴阮步兵
何須問寒暑徑共坐山亭
舉袂祛啼鳥揚巾掃落英
心神無俗累歌詠有新聲
新聲是何曲滄浪之水清

李邕

銅雀妓

西陵望何及絃管徒在茲
誰言死者苦但令生者悲
丈

夫有餘志兒女焉足私擾擾多俗情投迹互相師直節
豈感激荒淫乃淒其潁水有許由西山有伯夷頌聲何
寥寥唯聞銅雀詩君舉良未易永為後代嗤

蘇頲

昆明池晏坐王兵部珣見示以三韻因而有答
畫舸疾如飛遙遙汎夕暉石鯨吹浪隱玉女步塵歸獨
有銜恩處明珠在釣磯

小園納涼即事

煩暑避蒸鬱居間習高明長風自遠來層閣有餘清散
灑納涼氣蕭條遺世情奈何誇大隱終日繫塵纓

奉和聖製登蒲州逍遙樓

在昔堯舜禹遺塵成典謨聖皇東巡狩況乃經此都樓
觀紛迤邐山河幾縈紆緬懷祖宗業相繼文武圖尚德
既無險觀風諒有孚豈知汾水上簫鼓事遊娛

張說

本傳云時天子尊尚經術修太宗之政皆說倡
之說為文精壯既謫岳州而詩益悽惋人謂得

江山

助云

雜詩

抱薰心常焦舉旆心常搖
天長地自久懽樂能幾朝
君看西陵樹歌舞為誰嬌

奉陪登南樓

君子每念春江山共流眄
遠水林外明近巖霧中見
終日西北望何處是京縣
屢登高春臺徒使淚如霰

古泉驛

於陵仲子宅也

昔聞陳仲子守義辭三公身貨妻織屨樂亦在其中豈
無窮賤苦羞與傾巧同長白臨江上於陵入濟東我行
弔遺跡感歎古泉空

入海二首

乘桴入南海海曠不可臨茫茫失方面混混如凝陰雲
山相出沒天地互浮沈萬里無涯際云何測廣深潮波
自盈縮安得會虛心

海上三神山逍遙集衆仙靈心豈不同變化無常全龍

伯殊人類一釣兩鰲連金臺此淪沒玉真時播遷問子
勞何事江山泣經年隰中生紅草所美非美然

相州山池作

嘗懷謝公詠山水陶嘉月及此年事衰徒看衆花發觀
魚樂何在聽鳥情欲歇星漢流不停蓬萊去難越鄴中
秋麥秀淇上春雲沒日見塵物空如何靜心闕

雜興

問子青霞意何事留朱軒自言心遠俗未始跡辭喧遇

蒙良時幸側息吏途煩簪纓非宿好文史棄前言夕卧
北牕下夢歸南山園白雲慚幽谷清風愧泉源十年茲
賞廢佳期今復存挂冠謝朝侶星駕別君門

送郭大夫再使吐蕃

犬戎廢東獻漢使馳西極長策問酋渠猜狙自夷殛容
髮徂邊歲旌裘蔽海色五年一見家妻子不相識武庫
兵猶動金方事未息遠圖待才智苦節輸筋力脫刀贈
分手書帶加餐食知君萬里侯立功在異域

早霽南樓

山水佳新霽南樓翫初旭夜來枝半紅雨後洲全綠四
運相終始萬形紛代續適臨青草湖再鼓黃鶯曲地穴
穿東武江流下巴蜀歌聞枉渚遭舞見長沙促心遠居
無陋神和生自足白髮悲上春知當謝先欲

趙冬曦

春和早霽南樓

方曙躋南樓憑軒四遐矚物華蕩暄氣春景媚晴旭川

霽湘山孤林芳楚郊
縟列巖重疊翠遠岸
逶迤綠風帆
摩天垠漁艇散灣曲
鴻歸鶴舞送猿叫鶯
聲續羣動皆
熙熙噫予獨羈束常
欽才子義忌鵬陽蹢
躅雅尚騷人
文懷沙何迫促未知
二賢意去矣從所欲

韋嗣立

奉和張岳州王潭州別詩

并序

余昔忝省閣與岳州張使君說潭州王都督熊同
官聯事後承朝譴各自東西張公與王都督別詩

情頗殷切余覽以歎因遙申和云

茂先王佐才作牧楚江隈登樓正欲賦復遇仲宣來黃
鵠飛將遠雕龍文為開寧知昔聯事聽曲有餘哀

自湯還都經龍門北溪贈張左丞崔禮部崔光

祿

并序

僕自湯還都經龍門北溪莊宿張左丞崔禮部崔
光祿並枉垂光顧數公宿敦道義雅尚林壑謂急
於幽尋故此命駕遂不知別有勝賞偶然相過寒

暄未周神意已往雲霞之致蔑而不存逸轡放驅
清塵徒企耿歎不已而贈是詩

栖聞有愚谷好事枉朝軒樹接前驅擁巖傳後騎喧
簾出野院植杖候柴門既拂林下席仍攜池上樽深
期契幽賞實謂展歡言末眷誠未易佳遊時更敦俄
看嘯儔侶各已共飛騫延睇盡朝日長懷通夜魂空
聞岸竹動徒見浦花繁多愧春鶯曲相求意獨存

崔日知

奉酬韋祭酒偶遊龍門北溪忽懷驪山別業因
以言志示弟叔并呈諸大僚之作

夙齡秉微尚中年忽有鄰以茲出山癖遂得狎道人迨
我咸集作南京道聞君別一作北業新巖前窺石鏡河畔踏

芳茵既憐伊浦綠復憶霸池春連詞謝家子同歡冀野
賓趣閒魚共樂情洽鳥來馴詎念昔遊者祇命獨留秦
蕭條潁陽戀冲漠漢陰真無由陪勝躅空此翫書筠

韋元旦

九日侍燕應制

得月字

雲物開千里天行乘九月絲言丹鳳池
旆轉蒼龍闕
水歡娛地秦京遊俠窟
忻承解慍詞聖酒黃花發

崔湜

冀北春望

迴首覽燕趙春生兩河間
曠然萬里餘際海不見山
雨歇青林潤煙空綠野閒
問鄉何處所目送白雲還

韋述

晚渡伊水

悠悠涉伊水伊水清見石是時春向深兩岸草如積迢
迢望洲嶼逶迤亘津陌新樹落疎紅遙源上深碧回瞻
洛陽苑遽有長山隔煙霧猶辨家風塵已為客登涉多
異趣往來見行役雲氣早已昏鳥飛日將夕光陰逝不
惜超然慕疇昔遠遊亦何為歸來存竹帛

張九齡

明皇雜錄云九齡為相李林甫忌之張作歸燕
詩云無心與物競應非莫相猜林甫知其必退

惠慙稍解 本集序云曲江公詩其言造道雅
正冲澹體合風騷 司空圖云張曲江五言沈鬱

巫山高

巫山與天近煙景常青熒此中楚王夢夢得神女靈神
女去已久雲雨空冥冥唯有巴猿嘯哀音不可聽

登荊州城望江

滔滔大江水天地相終始經閱幾世人復歎誰家子東
望何悠悠西來晝夜流歲月既如此為心那不愁

晨出郡舍林下

晨興步北林蕭散一開襟復見林上月娟娟猶未沈片
雲自孤遠鼓篠亦清深無事由來貴方知物外心

感遇九首

蘭藥春葳蕤桂花秋皎潔欣欣此生意自以為佳節誰
知林栖者聞風坐見悅草木有本心何求美人折

幽人歸獨卧滯慮洗孤清持此謝高鳥因之傳達情日
夕懷空意人誰感至精飛沈理自隔何所慰吾誠

吳越數千里夢寐今夕見形骸非我親衾枕即鄉縣化

蝶猶不識川魚安可羨
海上有仙山歸期覺神變

抱影吟中夜誰聞此歎息
美人適異方庭樹含幽色
白雲愁不見滄海飛無翼
鳳凰一朝來竹花斯可食

江南有丹橘經冬猶綠林
豈伊地氣暖自有歲寒心
可以薦嘉客奈何阻重深
運命惟所遇循環不可尋
徒言樹桃李此木豈無陰

魚遊樂深池鳥栖欲高枝
嗟爾蜉蝣羽薨薨亦何為
有生豈不化所感奚若斯
神理日微滅吾心安得知
浩歎

楊朱子徒然泣路岐

卷二

孤鴻海上來池蒲不敢顧側見雙翠鳥巢在三珠樹矯
矯珍木巔得無金丸懼美服患人指高明逼神惡

劉瓛漢云

能言今我遊冥冥弋者何所慕

西日下山隱北風乘夕流燕雀感昏旦檐楹呼匹儔鴻
鵠雖自遠哀音非所求貴人棄疵賤下士常殷憂衆情
累外物恕已忘內修感歎長如此使我心悠悠

漢上有遊女求思安可得袖中一札書欲寄雙飛翼冥

冥愁不見耿耿徒緘憶紫蘭秀空蹊皓齒奪幽色馨香
歲欲晚感歎情何極白雲在南山日暮長太息

在郡秋懷

庭蕪生白露歲候感遐心策蹇慙遠途巢枝思故林小
人恐致冠終日如臨深魚鳥好自逸池籠安所欽挂冠
東都門採薇南山岑議道誠愧昔覽分還愜今撫然憂
成老空爾白頭吟

入廬山望瀑布泉

絕頂有縣泉喧喧出煙杪不知幾時歲但見無昏曉閃
閃青崖落鮮鮮白日皎灑流濕行雲濺沫驚飛鳥雷吼
何噴薄箭馳入窈窕昔聞山下蒙今乃林巒表物情有
詭激坤元曷紛矯默然置此去變化誰能了

西山祈雨是日輒應賦詩言志

茲山蘊靈異走望良有歸丘禱亦已久毗心難重違遲
明申藻薦先夕旅巖扉獨宿雲峯下蕭條人更稀我來
不外適幽抱自中微靜入風泉奏涼生松栝圍窮年滯

遠想寸晷閱清暉虛美悵無屬素情緘所依詭隨嫌弱
操羈束謝貞肥義濟亦吾道誠存為物祈靈心歛以應
甘液幸而飛閉閣且無責隨軒安敢希多慙德不感知
復是耶非

巡按自離水南行

理棹雖云遠飲水寧有惜况乃佳山川怡然傲潭石奇
峯岌前轉茂樹隈中積猿鳥聲自呼風泉氣相激目因
詭容逆心與清暉滌紛吾謬執簡行郡將移檄即事聊

全宋詩卷二
卷二
獨歡素懷豈兼適悠悠詠靡鹽庶以窮日夕

洪子興

嚴陵祠

漢主召子陵歸宿洛陽殿客星今安在隱迹猶可見水
石空潺湲松篁尚葱蒨岸深翠陰合川迴白雲徧幽徑
滋蕪沒荒祠羃霜霰垂釣想遺芳掇蘋羞野薦高風激
終古晤理忘榮賤方驗道可尊山林情不變

豆盧回

登樂遊廟懷古

緬維漢宣帝初謂皇曾孫雖在襁褓中亦遭巫蠱冤至
哉丙廷尉感激義彌敦馳逐蓮勺道出入諸陵門一朝
風雲會竟登天位尊握符昇寶歷負扈御華軒赫奕文
物備歲蕤休瑞繁卒為中興主垂名於後昆雄圖奄已
謝餘址空復存昔為樂遊苑今成狐兔園朝見牧豎集
夕聞栖鳥喧蕭條灞亭岸寂寞杜陵原羃歷野煙起蒼
茫嵐氣昏二曜屢迴薄四時更涼溫天道尚如此人理

安可論

齊澣

長門怨

熒熒孤思逼寂寂長門夜妾妬亦知非君恩那不惜攜
琴就玉階調悲心未諧將心託明月流影入君懷

王丘

詠史

高潔非養正盛名亦險巇
報偉哉謝安石攜妓入東山雲

巖響金奏空水豔朱顏
蘭露滋香澤松風鳴佩環
歌聲入空盡舞影到池間
杳眇同天上繁華非代間
卷舒混名跡縱誕無憂患
何必蘇門子冥然閉清關

蘇晉

過賈六

主人病且閒客來情彌適
一酌復一笑不知日將夕
昨來屬歡遊於今盡成昔
努力持所趣空名定何益

遜遜

葛山潭

圓潭寫流月
晴明涵萬象
仙翁何時還
綠水空蕩漾
涼哉草木腓
白露沾人衣
猶醉空山裏
時聞笙鶴飛

玄宗皇帝

送李邕之任滑臺

漢家重東郡
宛彼白馬津
黎庶既蕃殖
臨之勞近臣
遠別初首路
今行方及春
課成應第一
良牧爾當仁

經河上公廟

昔聞有耆叟河上獨遺榮跡與塵鷺隔心將道德并詎
以天地累寧為寵辱驚矯然遡寥廓如何屈堅貞玄
妙門啓肅肅祠宇清冥漠無先後那能紀姓名

行次成臯途經先聖擒建德之所緬思功業感
而賦詩

有隋政昏虐羣雄已交爭先聖按劍起叱咤風雲生飲
馬河洛竭作氣嵩華驚克敵睿圖就擒俘帝道亨顧慙
嗣寶厯恭承天下平幸過剪鯨地感慕神且英

校獵義成喜逢大雲率題九韻以示羣官

弧矢威天下旌旗遊近縣一面施鳥羅三驅教人戰暮
雲積成雪曉色開行殿皓然原隰同不覺林野變北風
勇士馬東日華組練觸地銀聲出連山編鹿見月兎落
高矰星狼下急箭既欣盈尺兆復憶盤溪便歲豐將
遇賢俱荷皇天眷

唐詩品彙卷二

欽定四庫全書

唐詩品彙卷三

明 高棅 編

五言古詩三

正宗 一

陳子昂

唐興文章承徐庾餘風子昂始變雅正初為威
遇詩王過見之曰是必為海內文宗盧黃門云
陳拾遺橫制顏波天下質文翕然一變 杜子
美過公故宅詩云位下曷足傷所貴在聖賢有

才繼騷雅哲匠不比肩公生楊馬後名與日月
懸韓退之亦云國朝盛文章子昂始高蹈益公
之詩為韓杜所推重
揭為正宗不亦宜乎

感遇詩三十六首

僧皎然云子昂感遇三十首
出自阮公詠懷詠懷之作難

以為倚 朱晦菴曰子讀陳子昂感遇詩愛其
詞旨幽遠音節豪宕非常世詞人所及如丹砂
空青金膏水碧雖近乏世用而實物外難得自
然之奇實然亦恨其不精於理而自託於仙佛
之間以為高也 劉後村曰唐初王楊沈宋擅
名然不脫齊梁之體獨陳拾遺首倡高雅冲澹
之音一掃六代之纖弱起於黃初建安矣太白
韋柳繼出皆自子昂發之及觀感遇詩數篇皆
蟬蛻翰墨畦逕諸之使人有眼空四海神遊八
極之興也 劉須溪云古詩惟參同契似先秦

文他如道家生神章度人歌類欲少冀世人者
此詩於音節猶不甚近獨刊落凡語存之隱約
在建安後自為一家雖未極
暢達如金如玉槩有其質矣

微月生西海幽陽始化昇圓光正東滿陰魄已朝凝太

極生天地三元更廢興至精諒斯在三五誰能徵

劉云其詩

於內外或自有見月本陰也而謂之幽陽三五陽也而
平明已缺極似契語三五山史記至道不遠三五必返

蘭若生春夏芊蔚何青青幽獨空林色朱蕤冒紫莖遲

遲白日晚娟娟秋風生歲華盡搖落芳意竟何成

劉云又以

芳草為
不足也

樂羊為魏將食子殉軍功骨肉且相薄他人安得忠吾

聞中山相乃屬放麕翁

屬麕於秦西已者孟孫也非中山相也

孤獸猶不

忍況以奉君終

一則忍於其子一則不忍於麕劉云此首用事造語皆有味又勝建安古詩如

此實少事雖誤

用語自可傳

市人矜巧智於道若童蒙傾奪相誇侈不知身所終曷

見玄冥

一作玄真

子觀世玉壺中杳然遺天地乘化入無窮

劉云觀世玉壺是其創語有見乘化入無窮又別

白日每不歸青陽時暮矣茫茫吾何思林卧觀無始衆

芳委時晦鵲鳩鳴悲耳鴻荒古已頽誰識巢居子

劉云起語

如此安得不豐然林卧觀無始定非俗物

林居病時久水木澹孤清閒卧觀物化悠然念無生青

春始萌達朱火已滿盈徂落方自此感歎何時平

劉云是古

詩得意者

臨歧泣世道天命良悠悠昔日殷王子玉馬遂朝周寶

鼎淪伊穀瑤臺成古丘西山傷遺老東陵有故侯

逶迤世已久骨鯁道斯窮豈無感激者時俗頽此風灌

園何其鄙皎皎於陵中世道不相容嗟嗟張長公

玄天幽且默羣議曷咄咄聖人教猶在世運久陵夷一
繩將何繫憂醉不能持去去行採芝勿為塵所欺

微霜知歲晏斧柯始青青況乃金天夕皓露沾羣英登
山望宇宙白日已西暝雲海方蕩潏孤鱗安得寧

挈瓶者誰子姣服當青春三五明月滿盈盈不自珍高
堂委金玉微纓懸千鈞如何負公鼎被奪笑時人

玄蟬號白露茲歲已蹉跎羣物從大化孤英將奈何瑤

臺有青鳥遠食玉山朶崑侖見玄鳳豈復虞雲羅
仲尼探元化幽鴻順陽和大運自盈縮春秋遞來過育
飈忽號怒萬物相紛劇溟海皆震蕩孤鳳其如何

昔日章華宴荆王樂荒淫霓旌翠羽益射兕雲夢林竭
來高唐觀悵望雲陽岑雄圖今何在黃雀空哀吟

荒哉穆天子好與白雲期宮人多怨曠層城閉蛾眉日
耽瑤池樂豈傷桃李時青苔空委絕白髮生羅帷

劉云
極似

風意

可憐瑤臺樹灼灼佳人姿碧華映朱實攀折青春時豈

不盛光寵榮君白玉墀但恨紅芳歇凋傷感所思

劉云古意

蒼蒼丁零塞今古緬荒途亭堠何摧兀暴骨無全軀黃

沙漠南起白日隱天隅漢甲三十萬曾以事匈奴但見

沙場死誰憐塞下孤

朝入雲中郡北望單于臺胡秦何密邇沙朔氣雄哉藉
藉天驕子猖狂已復來塞垣無名將亭堠空崔嵬咄嗟
吾何歎邊人塗草萊

金鼎合神丹世人將見欺飛飛騎羊子胡乃在蛾眉變
化固非類芳菲寧幾時疲病苦淪世憂悔日侵淄眷然
顧幽褐白雲空涕洟

深居觀元化怫然爭朶頤羣動相啖食利害紛嘒嘒便
夸毗子榮耀更相持務光讓天下高賈競刀錐已矣
行採芝萬世同一時

本為貴公子平生實愛才

劉云與王
聚意同

感時思報國拔劍

起蒿萊西馳丁零塞北上單于臺登山見千里懷古心

悠哉誰言未忘禍磨滅成塵埃

貴人難得意賞愛在須臾莫以心如玉探他明月珠昔

稱天桃子今為春市徒鳴鵲悲東國麋鹿泣姑蘇誰見

鳴夷子扁舟去五湖

劉云莫以心如玉不變為之入海求珠語自佳矣此如玉字與前桃

李花語同參差不盡類故是一病結得好

蜻蛉遊天地與世本無患飛飛未能止黃雀來相干穰

侯富秦寵金石比交歡出入咸陽裏諸侯莫敢言寧知

山東客激怒秦王肝布衣取卿相千載為辛酸

浩然坐何暮吾蜀有蛾眉念與楚狂子悠悠白雲期
哉悲不會涕泣久漣漣夢登綏山穴南采巫江芝探元
觀竒化遺世從雲螭婉孌將永矣感悟不見之

索居獨幾日炎夏忽然衰陽彩皆陰翳親友盡睽違登
山望不見涕泣久漣漣宿夢感顏色若與白雲期世中
驕豪子驅逐正咄咄蜀山與楚水攜手在何時

聖人去已久公道緬良難蚩蚩夸毗子堯禹以為謾驕
榮貴工巧勢利遞相干昭王尊樂毅分國願同歡魯連

卷三
讓齊爵遺組去邯鄲伊人信往矣感激為誰歎

吾觀龍變化乃是至陽精石林何冥密幽洞無留行古
之得仙道信與元化并玄感非象識誰能測沈冥世人
拘目見酣酒笑丹經崑侖有瑤樹安得采其英

謝云龍亦陰類

而謂之陽精則道家語也
玄感非象識五字見畧同

吾愛鬼谷子青溪無垢氛囊括經世道遺身在白雲七
雄方龍鬬天下亂無君浮榮不足貴遵養晦時文舒之
彌宇宙卷之不盈分豈徒山木壽空與麋鹿羣

劉云其詩多言

世外此又以鬼谷
自負非無能者

呦呦南山鹿羅罟以媒和招搖青桂樹幽蠹亦成科世
情甘近習榮耀紛如何怨憎未相復親愛生禍羅瑤臺
傾巧笑玉杯殞雙蛾誰見孤城樹青青成斧柯

劉云玉
杯殞雙

蛾謂婦人亦坐此北之親
愛如復仇內妬如桂樹

翡翠巢南海雄雌珠樹林何知美人意驕愛比黃金殺
身炎洲裏委羽玉堂陰旖旎光首飾歲蕤爛錦衾豈不
在遐遠虞羅忽見尋多材信為累歎息此珍禽

劉云多
是歎世

而卒不免於禍

子昂其子雲乎

朝發宜都渚浩然思故鄉故鄉不可見路隔巫山陽巫

山綵雲沒高丘正微茫佇立望已久涕淚沾衣裳豈茲

越鄉感憶昔楚襄王朝雲無處所荊國亦淪亡

劉云此首起結

轉換皆暢

賜可誦

聖人祕元命懼世亂其真如何嵩公輩談謫誤時人先

天誠為美階亂禍誰因長城備胡寇羸禍發其親赤精

既迷漢子年何救秦去去桃李花多年死如麻

劉云先天元命

皆非人所常道。嵩公雖不知如何，以胡寇喻
內外，可見第桃李花無喻，或是不言者得之。

竭來豪遊子，勢利禍之門。如何蘭膏歎，感激自生冤。衆

趨明所避，時棄道猶存。雲泉既已失，羅網與誰論。

劉云後世

誦其言而悲之

箕山有高節，湘水有清源。唯應白鷗鳥，可與洗

心言。

聖人不利己，憂濟在元元。黃屋非堯意，瑤臺安可論。吾
聞西方化清淨，道彌敦。奈何窮金玉，彫刻以為尊。雲構
山林盡，瑤圖珠翠煩。鬼功尚未可，人力安能存。夸愚適

增累矜智道逾昏

朔風吹海樹蕭條邊已秋
亭上誰家子哀哀明月樓
自言幽燕客結髮事遠遊
赤丸殺公吏白刃報私讐
避仇至海上被役此邊州
故鄉三千里遼水復悠悠
每憤胡兵入常為漢國羞
何如七十戰白首未封侯

劉云忽復造意至此

避仇常事被役復苦比古愈奇

幽居觀大運悠悠念羣生
終古代興沒豪聖莫能爭
三季淪周赧七雄滅秦嬴
復聞赤精子提劍入咸京
炎光

既無象晉虜復縱橫堯禹道已昧昏虐勢方行豈無當

世雄天道與胡兵咄咄安可言時醉而未醒

劉云洮首脫灑仲

尼溺東夏伯陽遁西溟大運自古來旅人胡歎哉

劉云晉虜

並說已警至天道與胡原醉無醒謂周旋諸夏為溺遁胡為高使人反覆屢嘆能言能言

薊丘覽古贈盧居士藏用六首

并序

丁酉歲吾北征出自薊門歷觀燕之舊都其城池

霸迹已蕪沒矣乃慨然仰歎憶樂生鄒子羣賢之

遊盛矣因登薊樓作六詩以志之寄終南盧居士

亦有軒轅遺跡也

北登薊丘望求古軒轅臺應龍已不見牧馬生黃埃尚
想廣成子遺跡白雲隈

右軒轅臺

南登碣石館遙望黃金臺丘陵盡喬木昭王安在哉霸
圖悵已矣驅馬復歸來

右燕昭王

王道已淪昧戰國競貪兵樂生何感激仗義下齊城雄
圖竟中天遺歎寄阿衡

右樂生

秦王日無道太子怨亦深一聞田光義匕首贈千金其

事雖不立千載為傷心

右燕太子

自古皆有死殉義良獨希奈何燕太子尚使田生疑伏
劍誠已矣感我涕沾衣

右田光先生

大運淪三代天人罕有窺鄒子何遼廓謾說九瀛垂興
亡已千載今也則無推

右鄒子

東至淇門答宋參軍之問

南星中大火將子涉清淇西林改微月征旆空自持碧
潭去已遠瑤花折遺誰若問遼陽戍悠悠天際期

酬暉上人夏日林泉

聞道白雲居窈窕青蓮宇巖泉萬丈流樹石千年古
林卧對軒牕山陰滿庭戶方釋塵事勞從君襲蘭杜

酬暉上人秋夜山亭有贈

皎皎白林秋微微翠山靜禪居感時變獨坐開軒屏
風泉夜聲雜月露宵光冷多謝忘機人塵憂未能整

送客

故人洞庭去楊柳春風生相送河洲晚蒼茫別思盈
白

蘋已堪把綠芷復含榮江南多桂樹歸客贈生平

登澤州城北樓宴

平生倦遊者觀化久無窮復來登此國臨望與君同坐
見秦兵壘遙聞趙將雄武安君何在長平事已空且歌
玄雲曲御酒舞薰風勿使青衿子嗟爾白頭翁

題居延古城贈喬十二知之

聞君東山意宿昔紫芝榮滄洲今何在華髮旅邊城還
漢功既薄逐胡策未行徒嗟白日暮坐對黃雲生桂枝

芳欲晚蕙改謗誰明無為空自老含歎負平生

答洛陽主人

平生白雲志早愛赤松遊事親恨未立從宦此中州主
人亦何問旅客非悠悠方謁明天子清宴奉良籌再取
連城壁三陟平津侯不然拂衣去歸從海上鷗寧隨當
代子傾仄且沈浮

西還至散關答喬補闕知之

歲蕤蒼梧鳳嘹唳白露蟬羽翰本非匹結交何獨全昔

君事胡馬予得奉戎旃攜手同沙塞關河緬幽燕芳歲
幾陽止白日屢徂遷功業雲臺薄平生玉佩捐歎此南
歸日猶聞北戍邊代水不可涉巴江亦潺湲攬衣度函
谷銜涕望秦川蜀門自茲始雲山方浩然

秋園卧病呈暉上人

幽寂曠日遙林園轉清密疲疴澹無豫獨坐汎瑤瑟懷
挾萬古情憂虞百年疾綿綿多滯思忽忽每如失緬想
赤松遊高尋白雲逸榮吝始都喪幽人遂貞吉圖書紛

滿牀山水藹盈室宿昔心所尚平生自茲畢願言誰見
知梵筵有同術八月高秋晚涼風正蕭颼

鴛鴦篇

飛飛鴛鴦鳥舉翼相蔽虧俱來綠潭裏共向白雲涯音
容相眷戀羽翮兩逶迤蘋萍戲春渚霜霰繞寒池浦沙
連岸淨汀樹拂潭垂年年此遊玩歲歲來追隨鳳凰起
丹穴獨向梧桐枝鴻鴈來紫塞空憶稻粱肥鳥啼倦永
夕鶴鳴傷別離豈若此雙禽飛翻不異林刷毛清江浦

交頸紫山岑文章負奇色和鳴皆好奇音聞有鴛鴦綺復
有鴛鴦衾持為美人贈勗此故交心

修竹篇與東方左史虬

并書

東方公足下文章道弊五百年矣漢魏風骨晉宋
莫傳然而文獻有可徵者僕嘗暇時觀齊梁間詩
綵麗競繁而寄興都絕每以永歎思古人常恐邈
迤頽靡風雅不作以耿耿也一昨於解三處見明
公詠孤桐篇骨氣端翔音情頓挫光英朗練有金

石聲遂用洗心飾視發揮幽鬱不圖正始之音復
覩於茲可使建安作者相視而笑解君云張茂先
何敬祖東方生與其比肩僕亦以為知言也故感
歎雅製作修竹詩一篇當有知音以傳示之

龍種生南嶺派翠鬱亭亭峰嶺上崇岑煙雨下微溟夜
聞鼯鼠叫晝聒泉壑聲春風正澹蕩白露已清泠哀響
激金奏密色滋玉英歲寒霜雪苦含篠獨青青豈不厭
凝冽羞比春木榮春木有盈歇此節無凋零始愿與金

石終古保堅貞不意伶倫子吹之學鳳鳴遂偶雲酥師
張樂奏天庭妙曲方千變簫韶已九成信蒙雕斲美常
願事仙靈驅馳翠虬駕伊鬱紫鸞笙結交羸臺女吟弄
昇天行攜手登白日遠遊戲赤城低昂玄鶴舞斷續彩
雲生永願隨衆仙三山遊玉京

遇崔司議泰之冀侍御珪二使

謝病南山下幽卧不知春使星入東京云是古交親惠
風吹寶瑟微月憶清真憑軒一留醉江海寄情人

登薊丘樓送賈兵曹入都

東山宿昔意北征非我心孤負平生願感涕下沾襟暮
登薊樓上永望燕山岑遼海方漫漫胡沙飛且深峨眉
杳如夢仙子曷由尋擊劍起歎息白日忽西沈聞君洛
陽使因子寄南音

唐詩品彙卷三

欽定四庫全書

唐詩品彙卷四

明 高棟 編

五言古詩四

正宗 二

李白 上

唐丹陽進士殷璠云白性嗜酒志不拘檢常林
棲十數載故其為文章率皆縱逸然自騷人以
還鮮有此體制也 李陽冰序畧云太白不讀
非聖之書耻為鄭衛之作故其多仙天之詞凡

言多賦興自風騷之後馳騁屈宋鞭撻揚馬千
載獨步唯公一人劉全白墓記畧云性惆悵
好縱橫術善賦詩才調逸出往往興會屬詞恐
古人之善詩者亦不逮宋南豐曾鞏後序畧
云白之詩連類引象義雖中於法度者寡然其
辭閎麗雋偉殆騷人所不及近世所未有也舊
史稱白有逸才志氣宏放飄然有超世之心予
以為實錄黃山谷云太白歌詩度越六代與
漢魏樂府爭衡樂城遺言云太白詩過人其平
生所得如浮花浪蘂如羅幃舒卷似有人間明
月直入無心可猜不可及也雪浪齋日記云
太白詩源流出於鮑明遠如樂府多用白紵等
語故曰俊逸鮑參軍也詩眼云建安詩辯而
不華質而不俚風調高雅格力遒壯得風雅騷
人氣骨最為近古唯李杜得之太白罕有全篇
多雅似鮑明遠體歸來子云太白天才俊麗

不可矩矱然要長於詩而文非其所能也 朱
子語錄云太白詩如無法度乃從容於法度之
中蓋聖於詩者 嚴滄浪云觀太白詩要識真
太白處太白天才豪逸語多率然而成者學者
於每篇中要識其安身立命處可也 又曰太
白發語謂之開門見山 又曰李杜二公不當
優劣子美沈鬱太白飄逸太白夢遊天姥吟蜀
道難等篇子美不能道子美北征兵車行垂老
別等作太白不能作夜之論詩以李杜為準扶
天子以令諸侯也 又曰少陵詩法如程不識
太白詩
如李廣

古風三十二首

朱子云太白古風兩卷皆自陳
子昂感遇中來亦有全用其句

處太白去子昂不遠其尊慕如此劉後村云
太白古風與陳子昂感遇之作筆力相上下

唐之詩人
皆在下風

大雅久不作吾衰竟誰陳
王風委蔓草戰國多荆榛
龍虎相啖食兵戈逮狂秦
正聲何微茫哀怨起騷人
揚馬激韻波開流蕩無垠
廢興雖萬變憲章亦已淪
自從建安來綺麗不足珍
聖代復元古垂衣貴清真
羣才屬休

明乘運共躍鱗

文質相炳煥衆星羅秋旻
我志在刪述

垂暉映千春希聖如有立
絕筆於獲麟

朱晦菴云李白詩不專是豪放

如首篇大雅久不作多少和緩

劉後村云此古今詩人之斷按也春陽揚齊賢云唐興文變極矣掃魏晉之

隨起騷人之廢太白益以自任矣覽其著述筆力翩翩如行雲流水出乎自然非思索而得豈欺我哉章貢蕭士贊云按本事詩訪曰李白才逸氣高與陳子昂齊名先後合德其論詩云齊梁以來體薄斯極沈休文又尚以聲律將復古道非我而誰觀此詩則太白之志可見斯其所以為有唐詩人之稱首者歟

蟾蜍薄太清蝕此瑤臺月圓光虧中天金魄遂淪沒蟬竦入紫微大明夷朝暉浮雲隔兩曜萬象昏陰霏蕭蕭

長門宮昔是今已非桂蠹花不實

蕭云是采廢王后制中語

天霜下

嚴威沈歎終永夕感我涕沾衣

楊云按唐書王皇后久無子而武妃有寵后不

平顯詆子遂廢欲立武妃為后太白詩意似屬乎此蕭云白意若曰夫婦君臣俱人之大倫也至密近者莫如

金史卷四
夫婦而且不能保其終況臣子之
疎遠乎此所以感歎而涕零也

秦皇掃六合虎視何雄哉飛劍決浮雲諸侯盡西來明
斷自天啓大畧駕羣才收兵鑄金人函谷正東開銘功
會稽嶺騁望瑯琊臺刑徒七十萬起土驪山隈尚采不
死藥茫然使心哀連弩射海魚長鯨正崔嵬額鼻象五
岳揚波噴雲雷鬣蔽青天何由覩蓬萊徐市載秦女
樓船幾時迴但見三泉下金棺葬寒灰

蕭云白意若曰
仙者自然無為

而化秦皇之所為宜其卒為方士所欺而不免
於死也後之為人君而好神仙者亦可以鑒矣

鳳飛九千仞五章備彩珍銜書且虛歸空入周與秦橫
絕歷四海所居未得鄰吾營紫河車千載落風塵藥物
秘海岳采鉛清谿濱時登大樓山舉首望仙真羽駕滅
去影飈車絕迴輪尚恐丹液遲志願不及伸徒霜鏡中
髮羞彼鶴上人桃李何處開此花非我春唯應清都境
長與韓衆親

蕭云此篇遊仙詩
太白自言其志云

太白何蒼蒼星辰上森列去天三百里邈爾與世絕中
有綠髮翁披雲卧松雪不笑亦不語冥棲在巖穴我來

逢真人長跪問寶訣粲然啓玉齒授以鍊藥說銘骨傳其語竦身已電滅仰望不可及蒼然五情熱吾將營丹

砂永與世人別

蕭云白少遇司馬承禎謂其有仙風道骨可與學仙此詩與前篇非汎然之作

客有鶴上仙飛飛凌太清揚言碧雲裏自道安期名兩兩白玉童雙吹紫鸞笙去影忽不見回風送天聲舉首

遠望之飄然若流星願餐金光草壽與天齊傾

蕭云此篇亦遊

仙詩恐是

贈答之詞

莊周夢蝴蝶蝶為莊周一體更變易萬事良悠悠乃

知蓬萊水復作清淺流青門種瓜人舊日東陵侯富貴

固如此營營何所求

劉須溪云語意音節適可如此而止蕭云此篇達生者之辭也謂

忽然為人化為異物忽為異物化而為人一體變易尚未能知悠悠萬事豈能盡知乎況又乃能知桑榆之變乎故侯種瓜富貴者固如是也既燭破此理尚何所求而營營苟苟以勞生哉

齊有個儻生魯連特高妙明月出海底一朝開光曜却

秦振英聲後世仰末照意輕千金盡顧向平原笑吾亦

淡蕩人拂衣可同調

蕭云白平生豪邁藐視權臣浮雲富貴此詩益有慕乎魯仲連之為人也

黃河走東溟白日落西海逝川與流光飄忽不相待春

容捨我去秋髮已衰改人生非寒松年貌豈長在吾當

乘雲螭吸景駐光彩

蕭云此篇欲學仙以離世其見趣又出乎流俗矣

松栢本孤直難為桃李顏
昭昭嚴子陵垂釣滄波間
身將客星隱心與白雲閒
長揖萬乘君還歸富春山
清風灑六合邈然不可攀
使我長嘆息冥棲巖石間

蕭云太白亦有

高尚其事之意此詩有所慕而作也

君平既棄世世亦棄君平
觀變窮大易探元化羣生寂
冥綴道論空簾閉幽情騶
虞不虛來驚鷺有時鳴安知

天漢上白日懸高名海客去已久誰人測沈冥

蕭云此篇雖詠

史詩其自負之意亦深矣與詠子陵意同

胡關饒風沙蕭索竟終古木落秋草黃登高望戎虜荒
城空大漠邊邑無遺堵白骨橫千霜嵯峨蔽榛莽借問
誰凌虐天驕毒威武赫怒我聖皇勞師事輦鼓陽和變
殺氣發卒騷中土三十六萬人哀哀淚如雨且悲就行
役安得營農圃不見征戍兒豈知關山苦李牧今不在

邊人飼豺虎

蕭云此篇當為哥舒翰敗石堡而作其旨微而顯歟

燕昭延郭隗遂築黃金臺劇辛方趙至鄒衍復齊來奈
何青雲士棄我如塵埃珠玉賈歌笑糟糠養賢才方知
黃鶴舉千里獨裴徊

蕭云此篇宜白不為時音所禮而作歎不然何其有黃鶴千里之句

吁讀其詩者百世之下猶有感慨

寶劍雙蛟龍雪花照芙蓉精光射天地雷騰不可衝一
去別金匣飛沈失相從風胡滅已久所以潛其鋒吳水
深萬丈楚山邈千里雌雄終不隔神物會當逢

劉云此篇似學

鮑照
而作

天津三月時千門桃與李朝為斷腸花暮逐東流水前
水復後水古今相續流新人非舊人年年橋上遊雞鳴
海色動謁帝羅公侯月落西上陽餘輝半城樓衣冠照
雲日朝下散皇州鞍馬如飛龍黃金絡馬頭行人皆辟
易志氣橫嵩丘入門上高堂列鼎錯珍羞香風引趙舞
清管隨齊謳七十紫鴛鴦雙雙戲庭幽行樂爭晝夜自
言度千秋功成身不退自古多愆尤黃天空歎息綠珠成
纈誓何如鷗夷子散髮棹扁舟

蕭云此篇嘆時青龍昔
不知退安得無李斯石

崇之

禍乎

郢客吟白雪遺響飛青天徒勞歌此曲舉世誰為傳試

為已人唱和者乃數千吞聲何足道歎息空淒然

蕭云士貞

才而不過能不讀其詩而為之吞聲歎息也歟

秋露白如玉團團下庭綠我行忽見之寒早悲歲促人

生鳥過目胡乃自結束景公一何愚牛山淚相續物苦

不知足得隴又望蜀人生若波瀾世路有屈曲三萬六千

日夜夜當秉燭

蕭云此篇言人功成當去奈何戀世不足而謀用心幾百年之內唯及時行樂

耳識者觀之豈不可笑歟蓋白之言不盡
意意在其中非聖於詩者孰能與於此乎

世道日交喪澆風散淳源不採芳桂枝反棲惡木根所

以桃李樹吐花竟不言

劉云十字不知何從出不辨其
說謂出於成蹊又淺淺知言者

也
大運有興沒羣動爭飛奔歸來廣成子去入無窮門

劉云結得更起 蕭云此篇見
世道如此決意為有道者之歸

三季分戰國七雄成亂麻王風何怨怒世道終紛拏至

人洞玄象高舉凌紫霞仲尼欲浮海吾祖之流沙聖賢

共淪沒臨岐胡咄嗟

蕭云此篇其作於安史亂離之後
遭難被黜之時乎不然何有羨乎

古人之高飛遠舉者
邪其志亦可哀矣

鄭客西入關行行未能已白馬華山君相逢平原里璧
遺鎬池君明年祖龍死秦人相謂曰吾屬可去矣一往

桃花源千春隔流水

蕭云此白深有羨乎避秦
之人卒欲全身遠害者乎

蓐收肅金氣西陸弦海月秋蟬號階軒感物憂不歇良

辰竟何許大運有淪忽天寒悲風生夜久衆星沒惻惻

不忍言哀歌逮明發

蕭云此悲秋之詩也嗟夫士有志
而不遇於時者千載讀之同一興

也懷

羽檄如流星虎符合專城喧呼救邊急羣鳥皆夜鳴

劉云

非蹊涉是境不知其妙處模寫及此則入神矣

白日耀紫微三公運權衡天地

皆得一澹然四海清借問此何為答言楚徵兵渡瀘及
五月將赴雲南征怯卒非戰士災方難遠行長號別嚴
親日月慘光晶泣盡繼以血心摧兩無聲困獸當猛虎
窮魚餌奔鯨干去不一回投軀豈全生如何舞干戚一

使有苗平

蕭云此篇為討雲南而敗歎大臣不能如益禹之佐舜敷文德以來遠人致有覆軍殺將

之耻其愛君憂國之意深矣言之者無罪聞之者足以戒悲夫

抱玉入楚國見疑古所聞良寶終見棄徒勞三獻君直
木忌先伐芳蘭哀自焚盈滿天所損沈冥道為羣東海
沈碧水西關乘紫雲魯連及柱史可以躡清芬

蕭云此篇歎士

之不過知己者易若效魯連柱史之高舉遠蹈與道為羣以保其身也哉

燕臣昔慟哭五月飛秋霜庶女號蒼天震風擊齊堂精
誠有所感造化為悲傷而我竟何辜遠身金殿傍浮雲
蔽紫闥白日難回光羣沙穢明珠束草凌孤芳古來共
歎息流淚空沾裳

蕭云此白被讒遭放黜而作哀而不傷怨而不誹

孤蘭生幽園衆草共蕪沒雖照陽春輝復悲高秋月飛

霜早浙澁綠豔恐休歇若無清風吹香氣為誰發

蕭云此亦

太白自傷而托興也

登高望四海天地何漫漫霜被羣物秋風飄大荒寒榮華東流水萬事皆波瀾白日掩徂輝浮雲無定端梧桐

巢燕雀枳棘棲鴛鸞且復歸去來劍歌行路難

蕭云此篇蓋謂

君子在下小人在上識時之士唯有歸去來而已

鳳饑不啄粟所食惟琅玕焉能與羣雞刺覩爭一餐朝

鳴崑丘樹夕飲砥柱湍歸飛海路遠獨宿天霜寒幸遇

王子晉結交青雲端懷恩未得報感別空長歎

蕭云此篇白自

比之辭蓋謂帝裔疎遠賀知章薦之方蒙知遇懷恩未報而歎息也

周穆八荒意漢皇萬乘尊淫樂心不極雄豪安足論西

海宴王母北宮邀上元瑤水聞遺歌玉杯竟空言靈跡

成蔓草徒悲千載魂

蕭云此篇蓋有諷乎明皇好神仙之事耳

八荒馳驚飈萬物盡凋落浮雲蔽顏陽洪波振大壑龍

鳳脫網罟飄飄將安託去去乘白駒空山詠場藿

蕭云此篇

謂遭世亂而得脫身羈囚無所
依託唯有詠白駒以自遣耳

桃花開東園含笑誇白日偶蒙東風榮生此豔陽質豈

無佳人色但恐花不實宛轉龍火飛零落早相失詎知

南山松獨立自蕭瑟

蕭云此篇謂士無實行偶然榮遇其寵衰則易於棄捐孰若君子有

持操而不

改節哉

越客採明珠提攜出南隅清輝照海月美價傾皇都獻

君君按劍懷寶空長吁魚目復相哂寸心增煩紆

蕭云此篇

謂賢者不遇於世小人
衣冠反得位而哂笑焉

我到巫山渚尋古登陽臺天空彩雲滅地遠清風來神
女去已久襄王安在哉荒淫竟淪替樵牧徒悲哀

蕭云此太

白南遠過巫山懷古而作

擬古八首

青天何歷歷明星如白石

劉云自然好

黃姑與織女相去不

盈尺銀河無鵲橋非時將安適閨人理紈素遊子悲行

役

劉云不如行子夜中飯

瓶冰知冬寒霜露欺遠客客似落葉飛

飄飄不言歸別後羅帶長愁寬去時衣乘月託宵夢因

之寄金徽

蕭云此篇傷時行役無期男女不得遂其家室感時而悲者焉

高樓入青天下有白玉堂明月看欲墮當牕懸清光遙

夜一美人羅衣沾秋霜含情弄柔瑟彈作陌上桑絃聲

何激烈風卷遠飛梁行人皆躑躅棲鳥去迴翔但寫妾

意苦莫辭此曲傷願逢同心者飛作紫鴛鴦

蕭云此篇喻賢懷才

抱藝不肯輕許諸人思

得同心同德而附之

今日風日好明日恐不如春風笑於人何乃愁自居吹
簫舞彩鳳酌醴醢神魚千金買一醉取樂不求餘達士

遺天地東門有二疏愚夫同瓦石有才能卷舒無事生

悲苦塊然涸轍鮒

蕭云此篇謂達士而能與時
卷舒者其太白之素志歟

運速天地閉胡風結飛霜百草死冬月六龍頽西荒太
白出東方彗星揚精光鴛鴦非越鳥何為眷南翔惟昔
鷹將犬今為侯與王得水成蛟龍爭池奪鳳凰北斗不
酌酒南箕空簸揚

蕭云此篇似是諷永王璘不
從知王不及與有為而作

月色不可掃客愁不可道玉露生秋衣流螢飛百草日
月終銷毀天地同枯槁螭啼青松安見此樹老金丹

寧誤俗昧者難精討爾非千歲翁多恨去世早飲酒入

玉壺藏身以為寶

劉云其初未有此意肆言及此達之
又達 蕭云此篇是反古詩服食求

神仙多為藥所誤蓋白之
素志欲學神仙猶反騷云

生者為過客死者為歸人天地一逆旅同悲萬古塵月
兔空搗藥扶桑已成薪白骨寂無言青松豈知春前後
更歎息浮榮何足珍

涉江弄秋水愛此荷花鮮攀荷弄其珠蕩漾不成圓佳
期彩雲重欲贈隔遠天相思無由見悵望涼風前

蕭云
此篇

喻賢者慕君纔得位而官之者至已欲有所獻而為讒所間也辭微意顯可謂怨而不譏

去去復去去辭君還憶君漢水既殊流楚山亦此人
生難稱意豈得長為羣越燕喜海日燕鴻思朔雲別久
容華晚琅玕不能飯日落知天昏夢長覺道遠望夫登
高山化石竟不返

劉云極其愁思語意終健古詩唐詩之興以此而觀人亦以此他人不如

太白者情事淺爾謂其詩十九婦人非知白者亦非知詩者蕭云此篇其太白去國之時所作乎身在江海心居魏闕懷君憂國之意藹然見於言辭之表末四句意是嗟嘆之曰雖遭時昏亂隔絕遠方然愛君之心猶石之堅也辭嚴意婉悲夫

沐浴子

沐芳莫彈冠浴蘭莫振衣處世忌太潔至人貴藏輝滄

浪有釣叟吾與爾同歸

蕭云此篇全襲括漁父詞意其太白涉難後之辭乎

子夜吳歌

長安一片月萬戶擣衣聲秋風吹不盡總是玉關情何
日平胡虜良人罷遠征

大堤曲

漢水臨襄陽花開大堤煖佳期大堤下淚向南雲滿春

風復無情吹我夢魂散不見眼中人
天長音信斷

塞下曲

烽火動沙漠連照甘泉雲漢皇按劍起還召李將軍
兵氣天上合鼓聲隴底聞橫行負勇起一戰淨妖氛

寄遠曲二首

青樓何所在乃在碧雲中寶鏡挂秋水羅衣輕春風
新粧坐落日悵望金屏空念此送短書願因雙飛鴻

妾在春陵東君居漢江島一日望花光往來成白道

一作

日日采靡蕪
上山成白道

一為雲雨別此地生秋草秋草秋蛾飛相
思愁落暉何時一相見滅燭解羅衣

秋浦歌

秋浦長似秋蕭條使人愁客愁不可渡行上東大樓正
西望長安下見江水流寄言向江水汝意憶儂不遙傳
一掬淚為我達揚州

秦女卷衣

天子居未央妾侍卷衣裳顧無紫宮寵敢拂黃金牀水

卷四
至亦不去熊來尚可當微身奉日月飄若螢之光願君
采葑菲無以下體妨

邯鄲才人嫁為廝養卒婦

妾本崇臺女揚蛾入丹闕自倚顏如花寧知有彫歇一
辭玉階下去若朝雲沒每憶邯鄲城深宮夢秋月君王

不可見惆悵至明發

蕭云北詩太白既點時借此發興其辭意悲戀宗國繫心於君亦得

離騷之
遺意歟

塞上曲

大漢無中策匈奴犯渭橋五原秋草綠胡馬一何驕命
將征西極橫行陰山側燕支落漢家婦女無顏色轉戰
渡黃河休兵樂事多蕭條清萬里瀚海寂無波

蕭云北
詩為李

靖伐突厥擒頡利斥地北至大漠故
太白美頌一時勲德惜漢以為喻

關山月

明月出天山蒼茫雲海間長風幾萬里吹度玉門關漢
下白登道胡窺青海灣由來征戰地不見有人還

劉云
偶然

玉門關一語以白
登清海拔涉甚長

戍客望邊邑思歸多苦顏高樓當此

夜歎息未應聞

呂氏云氣雄一世學者
熟味之自然不淺矣

獨不見

白馬誰家子黃龍邊塞兒
天山三丈雪豈是遠行時
春蕙忽秋草莎雞鳴西池
風摧寒櫓響月入霜閨悲
憶與君別年種桃齊蛾眉
桃今百餘尺花落成枯枝
終然獨不見流淚空自知

短歌行

白日何短短百年苦易滿
蒼穹浩茫茫萬劫太極長
麻

姑垂兩鬢一半已成霜天公見玉女大笑憶千場吾欲
攬六龍迴車挂扶桑北斗酌美酒勸龍各一觴富貴非
所願與人駐顏光

蕭云此辭雖擬古樂府然其辭意則出於騷肆為怪誕以寄興矣

妾薄命

漢帝寵阿嬌貯之黃金屋咳唾落九天隨風生珠玉寵
極愛還歇妬深情却踈長門一步地不肯暫迴車

劉云似婦

語人雨落不上天水覆難再收君情與妾意各自東西流

昔日芙蓉花今成斷根草以色事他人能得幾時好

劉云

興盡語盡蕭云此篇亦謂武惠妃奪寵而作辭意決斷令人感歎

古朗月行

小時不識月呼作白玉盤又疑瑤臺鏡飛在白雲端仙人垂兩足桂樹作團團白兔搗藥成問言誰與餐蟾蜍蝕圓影大明夜已殘羿昔落九烏天人清且安陰精此淪惑去去不足觀憂來其如何悽愴摧心肝

蕭云此篇為貴妃謠

亂而作也忠憤之意益於詞外

上之回

三十六離宮樓臺與天通
閣道步行月美人愁煙空恩
疎寵不及桃李傷春風
淫樂意何極金輿向田中
萬乘出黃道千旗揚彩虹
前軍細柳北後騎甘泉東
豈問渭川老寧邀襄野童
但慕瑤池宴歸來樂未窮

蕭云此篇言秦皇漢

武之幸田中者不過感志於神仙而已其諷諫明皇之意歟

怨歌行

十五入漢宮
花顏笑春紅
君王選玉色
侍寢金屏中
薦枕嬌夕月
卷衣戀春風
寧知趙飛燕
奪寵恨無窮
沈憂

能傷人綠鬢成霜蓬一朝不得意世事徒為空
鷓鴣換美酒舞衣罷彫龍寒苦不忍言為君奏
絲桐腸斷絃亦絕悲心夜忡忡

蕭云此篇雖宮怨之辭然寄興深遠怨而不譁

陌上桑

美女渭橋東春還事蠶作五馬如飛龍青絲結金絡不知誰家子調笑來相謔妾本秦羅敷玉顏豔名都綠條映素手採桑向城隅使君且不顧況復論秋胡寒蠶愛碧草鳴鳳棲青梧託心自有處但怪傍人愚徒令白日

暮高駕空踟躕

蕭云此篇言用世之士各有所從

白馬篇

龍馬花雪白金鞍五陵毫秋霜切玉劍落日明珠袍
雞事萬乘軒蓋一何高弓摧南山虎手接太行猱
酒後競風采三杯弄寶刀殺人如剪草劇孟同遊遨
發憤去函谷從軍向臨洮叱咤萬戰場匈奴盡奔逃
歸來使酒氣未肯拜蕭曹羞入原憲室荒淫隱蓬蒿

蕭云寓貶於襄寄揚於抑

深得國風之旨

俠客行

趙客縵胡纓，吳鉤霜雪明。
銀鞍照白馬，颯沓如流星。
十步殺一人，千里不留行。
事了拂衣去，深藏身與名。
間過信陵飲，脫劍膝前橫。
將炙啖朱亥，持觴勸侯嬴。
三杯吐然諾，五嶽倒為輕。
眼花耳熱後，意氣素霓生。
救趙揮金槌，邯鄲先震驚。
千秋二壯士，烜赫大梁城。
縱使俠骨香，不慙世上英。
誰能書閣下，白首太玄經。

長干行

妾髮初覆額折花門前劇郎騎竹馬來遶牀弄青梅同
居長千里兩小無嫌猜十四為君婦羞顏未嘗開低頭
向暗壁千喚不一回十五始展眉願同塵與灰常存抱
柱信豈上望夫臺十六君遠行瞿塘灘瀕堆五月不可
觸猿聲天上哀門前送行跡一一生綠苔苔深不能掃
落葉秋風早八月蝴蝶來雙飛西園草感此陽妾心坐
愁紅顏老早晚下三巴預將書報家相迎不道遠直至
長風沙


東武吟

好古笑流俗素聞賢達風方希佐明主長揖辭成功
白日在高天迴光燭微躬恭承鳳凰詔歛起雲蘿中清切
紫霄迴優游丹禁通君王賜顏色聲價凌煙虹乘輿擁
翠蓋扈從金城東寶馬麗絕景錦衣入新豐依巖望松
雪對酒鳴絲桐因學揚子雲獻賦甘泉宮天書美片善
清芬播無窮一朝去金馬飄落成飛蓬賓客日疎散玉
樽亦已空才力猶可倚不慙世上雄間作東武吟曲盡

情未終書此謝知已吾尋黃綺翁

蕭云此篇太白放黜之後自述其志以別

已知



唐詩品彙卷四